

IZVJEŠTAJ O RADU JEVREJSKE OPŠTINE U SARAJEVU

za period maj 2016. - maj 2018. godine

U ovom, kao što je bio slučaj u ranijim izvještajima, nećemo tretirati radne aktivnosti Jevrejske opštine u periodu od godinu dana, obzirom na promjene u Pravilniku o radu naše Opštine, ovaj izvještaj podnosimo za period od dvije godine, od maja 2016. do maja 2018. godine.

U pripremi ovog izvještaja pokušao sam analizirati rad komisija, sekcija i realizaciju drugih programa koji su bili urađeni u prethodnom izvještajnom periodu, uprkos činjenici da su glavne aktivnosti vođene putem kancelarije Opštine i uz angažman svih aktivista Opštine, a manje u samim komisijama. Često limitirajući faktor naših aktivnosti je relativno mali broj saradnika i aktivista koji žele da aktivno učestvuju u realizaciji rada naše Opštine, iako s radošću moram konstatovati da se osjeća napredak u volonterskom angažmanu omladine. Istine radi, omladinaca nemamo mnogo, nažalost, nas Jevreja uopšte i nema veliki broj, postajemo sve manja Opština, biološki se osipamo, tako da nam je svaki čovjek značajan.

To je naša stvarnost, zbog rata i odlaska velikog broja naših članova, naša zajednica je ostala prorijeđena, stariji članovi su pomalo umorni, a mlađih ljudi imamo vrlo malo, a trebamo shvatiti i prihvatiti činjenicu da u njihovim životima postoje drugi prioriteti, zaposlenje, stvaranje porodice itd.

Potrebne su nam nove i sadržajnije ideje, te nam u narednom periodu cilj treba biti proširenje i podmlađivanje saradničke mreže, kako bismo pri narednoj Skupštini, za dvije godine, kada je predviđena izborna Skupština naše Opštine, nadam se i definitivno povjerali Opštinu, ako ne potpuno novom, onda svakako podmlađenom rukovodstvu. Već sada imamo tri omladinca u našem Predsjedništvu što predstavlja osjetno osvježenje, ali očekujemo da se i njihova aktivnost značajnije osjeti u narednom periodu.

Želio bih da izvještaj ove godine ne bude opširan, da obuhvati glavne pravce aktivnosti u prethodnom periodu, te da diskusijama proširimo kako ovaj izvještaj, tako i da damo nove ideje za naredni period. Naravno, teško je izbjeći mnogobrojne aktivnosti, a bilo ih je izuzetno mnogo, tako da ukoliko neke ne pomenem, molim Vas bez zamjerke, interes nam je da istaknemo samo glavna dešavanja, bez podcjenjivanja onih koji se možda neće naći u našem izvještaju.

SEKCIJA ŽENA “BOHORETA”

U proteklom izvještajnom periodu redovnih aktivnosti, Bohoreta se u potpunosti uključila u organizaciju manifestacija koje su se održavale pod pokroviteljstvom Jevrejske opštine, ali i našeg društva La Benevolencija Sarajevo. U okviru redovnih aktivnosti u toku izvještajnog perioda, članice Bohorete su kompletno organizovale i pripremile sve vjerske praznike.

Aktivnosti Bohorete ogledale su se i u stalnoj brizi o starim, bolesnim i iznemoglim članovima naše zajednice, tako da socijalnu komponentu njihovog rada želim posebno istaći. Slično problemima opštine i Bohoreta ima problem starosne strukture, te je već sada učinjeno ponešto na podmlađivanju sekcije, ali mislim da će u narednom dvogodišnjem period to trebati biti jedan od prioriteta njihove aktivnosti.

VJERSKA KOMISIJA „CADIK DANON“

Vjerska komisija Jevrejske Opštine „Cadik Danon“ u pomenutom periodu je radila dosta improvizovano. Naime, sada kada se povukao raniji predmolitelj, te kada smo dobili novog predmolitelja, Komisija se nije ni sastajala u punom sastavu, već su se molitve pripremale i održavale neformalnim dogovorom, ali shodno običaju i pravilima koja već postoje, uz određene kvalitetno uspostavljene novine.

I dalje je u ovom segmentu rada Opštine primaran zadatak, ne samo Komisije, predmolitelja, nego svih nas, omasovljenje i pridobijanje nekih članova naše Opštine s ciljem povećanja broja ljudi u sinagogi, tačnije održavanje stalnog minjana, koji istini za volju uglavnom imamo, ali se dešavaju i drugačiji momenti kada nedostaje dva-tri člana i ne možemo održati kompletnu molitvu. Identitet ove kuće se u gradu gleda kroz vjersku aktivnost, te ma koliko bili tradicionalno prisutni za praznike, pokušajmo učiniti napor da nam i redovne šabatnje molitve budu dobro posječene.

Ovo se odnosi i na komemorativne skupove Jom Hašoa i Međunarodni dan sjećanja na žrtve Holokausta - 27. januar, jer su to značajni datumi kada se s dužnim pijetetom sjećamo naših stradalih sunarodnjaka, ali i učimo mlade ljude dijelu naše istorije.

Najveći problem naše komisije, kao i same Jevrejske Opštine je rad sa omladinom u vjerskom i nacionalnom smislu, zbog činjenične nezainteresovanosti članova naših omladinaca, što treba nastojati popraviti u budućnosti.

Mi, kao Jevrejska opština, registrovani smo kao vjerska zajednica, imamo redovnu molitvu za Šabat, imamo redovan, ali relativno skroman minjan. Želim naglasiti, posebno onima koji ne dolaze na molitve, da samo prisustvo velikog broja ljudi u sinagogi ne znači njihovu značajnu religioznost. Većina članova i današnjeg minjana, iako zna vrlo malo o judaizmu, dolazi u sinagogu, na molitvu, zbog želje da se tradicija Šabata ne izgubi, jer time, bojim se, malo po malo gubimo na vjerodostojnosti vjerske zajednice kojoj i u ovoj našoj državi pravo legitimiteta daje i zakon, ali i odnos drugih crkava i vjerskih zajednica prema nama.

Mišljenja koja sam čuo u prethodnom periodu, da bi svi oni koji ostvaruju neki prihod od svojih aktivnosti u Opštini trebali biti koliko-toliko i prisutni u sinagogi za Šabat, tema je za širu diskusiju, ali svakako treba objasniti jednu činjenicu. Šabat i molitva za šabat, sinagoga uopšte, je tradicija koja ovu Opštinu svrstava u vjerske zajednice, ali i daje ljudima identitet pripadnosti jevrejskom narodu. Bez sinagoge nemamo identifikaciju vjerske zajednice, postajemo samo nacionalna manjina, a porijeklo, naši preci nas obavezuju da održimo svoju tradiciju, kulturu i identitet, a to možemo samo kao vjerska zajednica. Znamo da nismo posebno religiozni, ali pokušajmo učiniti napor da nam Šabat i praznici budu dio naše obaveze, našeg identiteta.

SOCIJALNA KOMISIJA

Zadatak Socijalne komisije je da se brine za potrebite članove JO Sarajevo, te da u skladu sa svojim mogućnostima, odnosno finansijskim sredstvima koja su joj na raspolaganju pomogne svima čija je egzistencija ugrožena zbog siromaštava i neimaštine.

Tokom izvještajnog perioda Socijalna komisija u sastavu: Ela Albahari, Nela Levi, Maja Ćuković, Jadranka Vinšalek, Renata Lepoša, Nadža Finci i Elma Softić-Kaunitz održala je ukupno 6 sastanaka, tokom kojih je bilo odlučeno o dodjeli pomoći za 62 člana JO Sarajevo, od čega je 40 djece i omladine od 0 – 21. godinu starosti. Pomoć se dodjeljivala u vidu jednokratne, višekratne i redovne mjesečne novčane pomoći (ukupno za 53 korisnika) ali i kao pomoć u toplom obroku (za 13 korisnika, uključujući i troje djece).

Novčana pomoć bila je namijenjena za režijske troškove, liječenje (lijekovi, medicinska pomagala), te pomoć za penzionere sa najnižim penzijama, nezaposlene samce, samohrane majke i djecu iz porodica slabijeg materijalnog stanja.

Ukupna sredstva koja su dodijeljena od 1. juna 2016. do 1. juna 2018. godine iznose 42.227 KM. Od tog iznosa 8.760 KM je dodijeljeno u vidu novčane pomoći penzionerima s niskim iznosom penzije, nezaposlenim i samcima, 14.667 KM je dodijeljeno u vidu toplog obroka, 3.500 KM za liječenja, lijekove i medicinska pomagala te 15.300 KM u vidu novčane pomoći za djecu iz porodica slabijeg materijalnog stanja.

Izvori finansiranja socijalne pomoći bili su kako slijedi:

1. dobrovoljni prilozi u ukupnom iznosu od 1.765 KM
2. JDC donacija za odrasle u stanju potrebe u iznosu od 17.394 KM
3. JDC donacija za djecu iz porodica slabijeg materijalnog stanja u iznosu od 15.300 KM
4. La Benevolencija Deutschland 5.568 KM
5. Sredstva JO Sarajevo u iznosu od 2.200 KM

IZVJEŠTAJ SOCIJALNOG PROGRAMA ZA PREŽIVJELE HOLOKAUSTA

Godina 2017. nas je dočekala sa brojnim promjenama i pravilima u programu koje je donijela Njemačka Vlada i Claims Conference. Administracija Programa je uspješno odgovorila novim izazovima i u toku 2017. godine smo ukupno pružili 94.125 sati kućne njege za 84 klijenta iz Bosne i Hercegovine. Sve usluge kućne njege su obavljene preko davaoca usluga koji su potpisali Ugovor o djelu. Pored davaoca usluga i 9 socijalnih radnika se nalazilo na usluzi klijentima programa. Pored usluga kućne njege, finansirali smo i usluge profesionalne njege kao što je fizioterapija, kineziterapija, kupanje i sl. Zatim smo refundirali troškove za kupovinu lijekova, medicinskih pregleda, medicinske opreme i dodatne hrane.

U 2017. godini smo imali posjetu Generalnog kontrolora iz Claims Conferencea čiji je izvještaj bio pozitivan. Ustanovljeno je da smo radili u skladu sa pravilima donatora, te da su mogli uspješno pratiti trag novca koji su donirali.

Ono što planiramo realizirati u 2018. godini je osnaživanje programa socializacije i pokretanje psihološkog programa za naše klijente.

IZVJEŠTAJ O RADU MALE ŠKOLE

Rad male škole usmjeren je na očuvanje i promovisanje kulture specifične Jevrejima BiH. Kroz aktivnosti koje djeci približavaju tradiciju na zabavan i koristan način. Poštujući jevrejsku tradiciju, poštuje se i afirmira i kultura drugih naroda u BiH.

Broj djece koja dolaze u Sunday school je 20. U rad škole uključena su 2 vaspitača i dva asistenta.

Za razliku od prethodnih godina, ove godine smo uključili i djecu mlađu od 3 godine. Naravno djeca borave u našim prostorijama uz prisustvo jednog od roditelja. Konceptija programa naše škole ima u vidu dvije grupe djece (od 2 do 5 godine) i drugu grupu (od 6 do 13 godina). Ciljevi se i sadržaji u pojedinim godištim nastoje formulirati u skladu s njihovim mogućnostima i interesovanjima. To znači, među ostalim, da se osobita briga vodi o oblikovanju sadržajnih cjelina u skladu s ciljevima koje želimo postići. Pristup u radu je individualni i grupni a metode koje koristimo u radu su : sistematičnost, kombinovanu, situacionu, takmičarsku, metode igre, žive riječi itd. Osim sadržaja koji se odnose na jevrejsku tradiciju i kulturu, u našem radu organizujemo akcije čišćenja dvorišta, sađenje čvijeća i veliko spremanje našeg kluba.

Teme koje smo radili su svi jevrejski praznici, uključujući I pripreme neophodne za obilježavanje praznika, (teorijski i praktični dio). Svaki praznik smo obilježili na sljedeći način : priča o prazniku , upoznavanje sa važnim običajima , organizovali smo radionice , glumili , pravili panoe, pjevali i plesali. Kao i prethodnih godina za praznike Hanuka i Purim smo imali tradicionalni nastup sa djecom u koji

je bila uključena priča, igra i pjesma. Trudimo se da u sve aktivnosti uključimo i roditelje.

Prijedlozi koje smo dobili od vaspitačica naše škole, a odnose se na kvalitetniji rad male škole bi bili:

1. Svake godine se povlači pitanje da se obezbijedi adekvatniji prostor u kojem će boraviti djeca. Prostor koji nam je bio ponuđen prije dvije godine, nije bio dovoljno velik za malu školicu. U prostoru u kojem sada boravimo stepenice predstavljaju veliki problem, također činjenica da toaleta nema u blizini, već djeca moraju sići tri sprata niže kako bi otišla do toaleta. Prostorije u kojima boravimo su u pločicama, tako da je zimi jako hladno i neuslovno za djeca boravak djece.

Moramo istaći da se nalazimo u fazi prikupljanja ponuda za izradu multifunkcionalnih ormarića za restoransku prostoriju, koji bi omogućili nastavak rada Male škole u prostoru restorana, gdje 20 djece može boraviti i raditi bez većih i prethodno navedenih problema.

2. Informisati članove jevrejske zajednice o važnosti postojanja Male škole. Obzirom na ciljeve ove škole bilo bi poželjno ohrabriti članove jevrejske opštine koji imaju djecu da ih dovode na druženja u Malu školu gdje će kroz igru imati priliku da uče o jevrejskoj tradiciji, raznim običajima i razvijanju osjećaja identiteta, odnosno spoznaje da pripadaju jevrejskoj zajednici.

Promovisanje male škole može da se uradi na sljedeći način: pokušat ćemo organizovati zajednički sastanak gdje možemo održati prezentaciju o radu Male škole, izlazak članka u Jevrejskom glasu, slanje mailova na sve adrese koje imamo, uz intenzivniji rad sa zainteresovanim roditeljima.

IZVJEŠTAJ STUDENSKOG KLUBA

U studentski klub u navedenom periodu, za razliku od ranijih godina, aktivno je dolazilo 20 studenata. Sastanci Kluba su se održavali jednom sedmično u za to posebno uređenim i studentima dodijeljenim prostorijama Jevrejske opštine. Svake sedmice su organizovana predavanja na različite teme: Ljudska prava, međureligijski dijalog, stereotipi i predrasude, sjećanje na žrtve Holokausta, team building, život i stvaralaštvo Flory Jagode, te su samostalno, a rjeđe i zajedno sa starijim članstvom Opštine obilježavali sve jevrejske praznike, najčešće zajedno sa Malom školom.

U sklopu Studentskog kluba organizovana su predavanja gostujućih predavača: prof. David Kamhi, nerezidentnog rabina Eliezer Pape i hazana naše opštine Igora Kožemjakina, na teme koje su interesovale studente.

Također su realizirali i različite aktivnosti i seminare, posebno naglašavamo međugeneracijsko druženje koje je za cilj imalo zblizavanje i upoznavanje članova Studentskog kluba sa starijim članovima opštine uz prigodan program i zakusku.

Međuklupski susret se održao u Banjaluci s ciljem upoznavanja mladih, srednoškolaca i studenata Jevreja iz cijele Bosne i Hercegovine. Naši studenti su učestvovali u akciji čišćenja jevrejskog groblja u sklopu aktivnosti ASF organizacije. Ova aktivnost se održavala u augustu prethodne dvije godine, gdje su pored volontera koji su učestvovali u ovom projektu, prisustvovali i neki članovi Studentskog kluba. Treba istaći i veoma bitnu aktivnost na realizaciji seminara „Bounds that last“ koji se desio u Sarajevu i okupio 80 mladih Jevreja iz cijele Ex-Jugoslavije.

Članovi omladinskog kluba bili su dio projekta Good Deeds Day (dani dobrih djela). To je globalni pokret koji ujedinjuje milione širom svijeta radi dobrih djela u korist drugih i planete, i održava se svake godine u aprilu. Studenti su posjetili KJU „Dom za djecu bez roditeljskog staranja“ na Bjelavama, koje su obradovali i prezentirali im

pripremljene igrice različitog karaktera (ručni fudbal, između dvije vatre, redanje po visini isl.), zajedno radili na art radionici na kojoj su djeca s posebnim potrebama, zajedno sa volonterima oslikali veliku platu. Na kraju su se svi zajedno počastili pizzom i sokovima.

Pored navedenih aktivnosti članovi studentskog kluba su bili učesnici seminara koji su organizovali Jevrejska opština Sarajevo te jevrejske opštine u regionu. Bili su i učesnici seminara za pisanje projekta koji se održao u sarajevskoj Jevrejskoj opštini, omladinskih seminara u Zagrebu i Beogradu. Vrijedi istaći i aktivnosti studenata, te njihovo učešće na edukacijskom seminaru u organizaciji Saveza jevrejskih opština Srbije, ali i aktivnosti na jevrejskim ljetovanjima, gdje su pojedinci bili madrihimi u nekoliko dječijih kampova i seminara (Szarvas, Pirovac i Sremski Karlovci).

KULTURNA DEŠAVANJA U IZVJEŠTAJNOM PERIODU

Kako je i primjereno, za kultu se u našoj zajednici, shodno prethodnoj odluci i podjeli djelatnosti bavi naše kulturno-prosvjetno i humanitarno društvo „La Benevolencija“, tako da ovaj izvještaj obuhvata samo manji, osnovni segment aktivnosti iz oblasti kulture koji se dešavao u našoj Opštini.

Tokom izvještajnog perioda JO Sarajevo je preko svog društva „La Benevolencija“ ili samostalno organizovala ili učestvovala u organizaciji i/ ili finansijski podržala ukupno 63 različita kulturno-edukativna programa kao što su: izložbe (26), projekcije filmova (4), pozorišne predstave (2), koncerti (3), promocije knjiga (2), predavanja (2), seminari (2), okrugli stolovi i paneli (2), konferencije (1), komemoracije i priredbe (4), festivali (3) te izdavanje „Jevrejskog glasa“ – glasila Jevrejske zajednice BiH (11 brojeva).

Ono što mora da nas zabrine u ovom trenutku je izuzetno mali broj članova Opštine koji bivaju prisutni na našim manifestacijama, te to, po ko zna koji put naglašavam. Mišljenja sam da to moramo korigovati vlastitim angažovanjem, kako na animaciji članstva, tako i vlastitim prisustvom, ne samo na izložbama, koncertima ili komemoracijama, nego i svim drugim kulturnim

manifestacijama kojima smo mi domaćini ili organizatori.

BIBLIOTEKA

I PROBLEMATIKA ISTE

Naša biblioteka, kao što vam je poznato, nalazila se već duže vrijeme u veoma lošem i nesređenom stanju. Da bismo mogli konačno srediti stanje i vratiti korektnu funkciju, angažovali smo osobu, koja je preuzela obavezu sređivanja, kompletiranja i evidentiranja cjelokupnog bibliotečkog fonda. S ovim zadatkom počeli smo 1. maja 2017. godine, prije nešto više od godinu dana.

O zatečenom stanju dovoljno je reći da je bilo haotično. Prostorije su bile prljave, zapuštene i u neredu. Knjige nabacane po policama i ispod njih, na podu u kartonskim kutijama desetine bibliotečkih jedinica, rasvjeta neadekvatna, zidovi zapušteni.

Kao prvo, promijenili smo bravu na ulaznim vratima kako nitko nepozvan ne bi mogao ulaziti kad i kako mu se prohtije, što je ranije bio slučaj. Zahvaljujući donaciji glavna prostorija biblioteke je okrećena a izmijenjeni su i prozori u njoj kao i u prijemnoj kancelariji. Sanirana je rasvjeta i nabavljen upotrebljiv kompjuter za kvalitetno evidentiranje bibliotečke građe.

Što se samog knjižnog fonda tiče nije postojala adekvatna i ažurirana evidencija a kompjuterski bibliotekarski program koji je ranije korišten zadnji put je ažuriran prije dvije i po godine. One nove knjige koje su od odlaska prethodne bibliotekarke stizale u biblioteku nigdje nisu zavedene pa se tako desilo da su neke od njih nestale, otuđene.

Kao primjer navodimo izdanja Arhiva BiH Bohoretinih rukopisa u tri toma za koje pouzdano znamo da su prvi i drugi došli do biblioteke a zatim netragom nestali. Zahvaljujući ljubaznosti

djelatnika Arhiva nabavljene su ponovno te knjige pa je sada taj set kompletiran. Drugi slučaj otuđivanja vrijednih knjiga je poznati Nehamov rječnik judeo-španskog. U biblioteci je zatečena samo tek loša kopija dok je originalno izdanje nestalo. Zahvaljujući donaciji Katje Šmit, suradnice Rotšild fondacije naša je biblioteka ponovo u posjedu ovog vrijednog rječnika.

Da bi biblioteka mogla nastaviti kvalitetan rad, Predsjedništvo naše Opštine je donijelo Pravilnik o radu biblioteke koji je objavljen u našem glasilu „Jevrejski glas“ i nadamo se da će dosadašnji i budući korisnici prvo vratiti pozajmljene knjige, te iste koristiti shodno usvojenim pravilima.

DEŠAVANJA I PROBLEMATIKA KOJA NAS OPTEREĆUJE

Iako je najznačajniji događaj u godini prije izvještajnog perioda bio svakako obilježavanje 450. godina postojanja Jevrejske opštine u Sarajevu, koji smo dostojanstveno i kvalitetno obilježili, sa mnogo gorčine možemo konstatovati da naše manifestacije nailaze na različit odnos organa vlasti, zavisno od slučaja do slučaja.

Pojedine manifestacije su finansijski podržali Federacija BiH, naknadno, ali ipak za nas značajno, dok su uglavnom promptno reagovali naši prijatelji iz opštine Centar, koji i inače imaju jedan korektan odnos prema Jevrejskoj opštini i našim potrebama, naravno u granicama svojih finansijskih mogućnosti.

Kada govorimo o našim aktivnostima da budemo akteri ili bar prisutni na mnogim dešavanjima u našoj Opštini, kao i uvijek, najbrojniji smo kada obilježavamo naše praznike i značajne datume, što može da raduje, jer tih dana afirmišemo jevrejski identitet, do kojeg nam je, nadamo se, svima najviše i stalo, a o čemu sam već govorio u dijelu koji se odnosio na rad Vjerske komisije „Cadik Danon“.

Na sreću, uprkos činjenici da ni ove godine sala naše Opštine nije bila puna, moramo konstatovati i činjenicu da je ove godine Seder veče za veliki praznik Pesah, bila nešto bolje posjećena nego prethodne 2017. godine.

Možda je ionako malobrojno članstvo pomalo umorno od naših aktivnosti, ali naši praznici i

značajni datumi naše istorije, trebali bi predstavljati obavezu, a ne samo izbor članstva i želju da budu ili ne na samom događaju. Ne želim da vjerujem da je simbolična cijena seder večere od 10 KM prepreka dolaska nekih članova Opštine.

Mišljenja sam da je rad pojedinih sekcija naše Opštine mogao biti znatno bolji i sadržajni, te u svakom slučaju efikasniji i potpuniji, ali to se uklapa u ono poznato „nikad nije tako dobro da ne bi moglo biti bolje“.

Samodoprinos, odnosno prikupljene članarine u 2017. godini iznosile su manje nego ranijih godina, nešto manje od 8,000.00 KM, dok su dobrovoljni prilozi članova također podbacili u odnosu na prethodne godine. Nažalost, nama trebaju znatno veća sredstva, od državnih institucija, odnosno organa vlasti na svim nivoima, ne možemo očekivati povoljniji tretman, te želim da ponovo upoznam Skupštinu s činjenicom da ćemo u ovoj, a bojim se i u nekoliko narednih godina biti prisiljeni trošiti i dio vlastitih rezervi, akumuliranih prethodnih godina.

Za sada smo uspijevali pozitivno poslovati i u 2016. i 2017. godini, ali bojim se da idu teža vremena, odnosno skromnije donacije. To naravno ne znači da ne treba insistirati na redovnom plaćanju članarine, što bi trebalo da bude obaveza svih članova Opštine, a također treba razmisliti i o eventualnom povećanju iznosa članarine, koja danas iznosi 2,00 KM mjesečno. Našim Pravilnikom o radu utvrđena je obaveza plaćanja članarine, te i represivne mjere brisanja iz članstva onih koji ne žele ispunjavati svoju obavezu.

U 2016. godini uplaćen je iznos članarine od 8,450.00 KM, dok je u 2017. godini uplaćeno 7,640.00 KM, što je u odnosu na broj evidentiranih članova vrlo malo i nadamo se da će članstvo nakon ove Skupštine i u narednom periodu pokazati znatno više samodiscipline i uplatiti članarinu za ovu 2018. kalendarsku godinu.

Istini za volju, zabrinula nas je činjenica da je jedan broj naših, sada već ranijih članova,

na insistiranje da uplate iznos članarine odlučio prestatu biti članom Opštine. Nadam se da se ta tendencija neće nastaviti.

Kao što znate, već duži niz godina, vrlo uspješno posluje i naše društvo uzajamne samopomoći „Hevra Kadiša“. Ove dvije godine iznos članarina prikupljenih od aktivnih članova zajednice iznosi 17.280 KM.

U periodu 2016/2018 godina preminulo je 11 članova Jevrejske opštine koji su bili članovi društva „Hevra Kadiša“. Iz fonda društva isplaćeno je 16,500 KM članovima porodica na ime pomoći za pokrivanje troškova sahrane.

U izvještajnom periodu primljeno je 5 novih članova tako da naša zajednica sada broji 508 članova. Izvjestan broj članova plaća članarinu unazad, najveći period kašnjenja je između 6 i 8 mjeseci. Dva člana društva (jedan trenutno živi u Kanadi), a drugi u staračkom domu u Splitu nisu platili članarinu. Niti doprinos za preminule već dvije godine.

Postavlja se i pitanje kako su naši ljudi informisani o aktivnostima i dešavanjima u našoj Opštini, te da li tu treba učiniti dodatne napore da se informisanost poboljša.

Mislim da informisanost članstva Opštine o svim akcijama koje poduzimamo, o praznicima, njihovom obilježavanju, o komemoracijama ili susretima koji se organizuju s ciljem druženja porodica jevrejskih zajednica iz bivše Jugoslavije ne treba, niti može biti bolja. Mi to radimo putem e-mail komunikacije, putem informacija u „Jevrejskom glasu“, oglašavanjem na tri oglasne ploče u Opštini. Bilo bi potrebno da članstvo češće dođe u Opštinu, da mnogi koji danas nemaju, sutra otvore svoje e-mail adrese, te da čitaju „Jevrejski glas“, te naravno da budu aktivni učesnici naših akcija.

Naša web stranica je izuzetno dobro posjećena. Naravno, zbog izostanka saradnika nije uvijek potpuno aktuelna. Sada radimo novu web stranicu, ali njena aktuelnost zavisi i od naših

aktivnosti, te tu treba tražiti nove mogućnosti bolje informisanosti posjetilaca stranice, koji najčešće nisu naši članovi, što mora da nas raduje. Od prije dvije godine se i emisije Radio La Benevolencije emituju na našoj web stranici, te je i to razlog više za njeno redovno održavanje. Često obavještenja o našim aktivnostima možete pročitati i na facebooku na kojem iste objavljuju naši omladinci, čiji rad je sve zapaženiji.

Kao što vam je poznato u novom Pravilniku o radu Jevrejske opštine umjesto Nadzornog odbora utvrdili smo funkciju internog revizora, imenovali smo istog i njegovog zamjenika, koji su pregledom poslovanja utvrdili pozitivno poslovanje, uz određene sugestije na kvalitetnijem finansijskom izvještavanju, što je Predsjedništvo naše Opštine i prihvatilo. Nažalost, izvještaji interne revizije bi mogli biti i stručniji, te sveobuhvatniji, ali unutar raspoloživih i raspoloživih članova nemamo dobrovoljaca za taj rad. Pozitivna činjenica je da je rad Opštine u finansijskom smislu pokazao dobre rezultate, odgovarajući manji suficit, ali koji je zahvaljujući prodaji jednog objekta takav, dok bi bez toga bio više nego zabrinjavajući. Takvu tendenciju očekujemo i u narednom periodu, jer interes lokalnih organa uprave koji djelimično pokrivaju dio troškova Opštine nije adekvatan i odražava stanje u državi, ali i marginaliziranost naše Opštine, koju možda subjektivno osjećam.

Veoma značajno je u ovom izvještaju istaći saradnju koju ostvarujemo sa drugim vjerskim zajednicama i crkvama, nešto manje bilateralno, a uglavnom u okviru aktivnosti u Međureligijskom vijeću Bosne i Hercegovine, gdje smo u izvještajnom periodu učestvovali u svim aktivnostima i svim akcijama koje je provodilo Vijeće, i to na svim njegovim nivoima organizovanja.

Saradnja sa Jevrejskim opštinama u Bosni i Hercegovini je bila veoma skromna, osim saradnje u distribuciji sredstava tkz. „manjim“ Opštinama. Sva raspodjela sredstava koja se distribuiraju putem našeg računovodstva je tekla normalno, bez bilo kakvih zastoja, a zavisila je jedino od ažurnosti dostave sredstava za navedene opštine od JDC, gdje

je znalo dolaziti do kašnjenja u uplatama. Rad same Jevrejske zajednice BiH je limitiran sredstvima, jer zajednica nema izvornih prihoda a Opštine nisu u mogućnosti da finansiraju češća sastajanja.

Narastajući antisemitizam u Evropi i svijetu uopšte, potenciran i najnovijim dešavanjima u nekim od zemalja Evrope, u Izraelu, ali i u nama susjednim zemljama, te zaokretom u jednom broju država, gdje je desnica preuzela vlast, mora da nas zabrine. Istini za volju, mi kao Jevreji i naša Opština, u Bosni i Hercegovini nemamo nekih posebnih problema, ali zadatak nam je da budemo na oprezu i da se postaramo da svojom ishitrenom i nepotrebnom reakcijom na eventualna dešavanje ne isprovociramo neželjenu reakciju šire javnosti.

Po treći put nam se desilo da nam ukradu tek postavljene nove dvije kamere, i ta okolnost nas brine, ali čvrsto vjerujemo da se radi o koristoljublju, a ne o napadu na našu vjersku zajednicu.

Kao što znate u državama ex Jugoslavije, u želji da održimo koliko koliko neophodno jevrejsko jedinstvo na ovim prostorima, organizuju se različite manifestacije, nekad obrazovnog, a nekad i društveno-zabavnog karaktera, sve sa željom da državne granice ne budu prepreka našim vezama koje smo toliko godina gajili i razvijali u ranije našoj zajedničkoj domovini. Nastavljajući tu tradiciju, trudimo se biti prisutni na tim manifestacijama, ali zbog sve teže finansijske situacije, naše prisustvo je sve malobrojnije. Istini za volju, sve susrete finansiraju učesnici sami, ne opterećujemo troškovima Opštinu, ali smanjen broj učesnika nam govori i o padu standarda naših članova, koji je evidentan, ali koji je prisutan i u gradu u kojem živimo.

Pokušat ćemo se možda ograničiti na intenzivnije učešće u manifestacijama koje imaju za cilj očuvanje jevrejskog identiteta na ovim prostorima, gdje ćemo i kao Opština finansijski pomoći samo takve manifestacije, dok će druge manifestacije biti finansirane samo ličnim učešćem onih koji žele i mogu u istima sudjelovati, nastavljajući time dosadašnju praksu. Tako smo u izvještajnom periodu bili učesnici dva Mahara, porodičnog okupljanja u Budvi na moru u Crnoj Gori, te u veoma malom broju Porodičnog seminara

u Kladovu za vrijeme prvomajskih praznika, te u dva okupljanja u organizaciji Židovske općine Zagreb u Čateškim i Tuheljskim toplicama. Redovni smo učesnici Šoleta u Novom Sadu.

Prije nedelju dana bili smo na komemoraciji u Đakovu, zbog zastoja na graničnom prelazu, koji je onemogućio dolazak na vrijeme, uz telefonsko javljanje organizatoru, očekivali smo toleranciju u čekanju na početak komemoracije. Na moje iznenađenje polaganje vijenaca je već bilo obavljeno, te smo ipak mogli prisustvovati možda i najznačajnijem dijelu komemoracije, molitvi za žrtve ustaškog zločina nad Jevrejima u logorima Đakovo i Loborgrad.

Za nedjelju dana idemo na komemoraciju u Stolac, na grob Rav Moše Danona, te očekujemo značajnije prisustvo članstva naše Opštine.

Na koji način ćemo raditi bolje i efikasnije u narednom dvogodišnjem periodu, koji po najavama neće biti nimalo lagan, te pred nama stoje veoma teški zadaci da pokušamo prevazići najave produženja već godinama prisutne finansijske krize, zavisit će od svih nas, našeg pristupa i aktivnijeg odnosa u svim aktivnostima i radu naše Opštine.

Nadamo se da ćete u svojim diskusijama biti koliko koliko kritični, da ćete realno ocijeniti prethodni izvještajni period. Danas imate mogućnost da ocijenite i ukupan četverogodišnji rad ovog Predsjedništva, te svojom diskusijom i konkretnim prijedlozima akcija date smjernice za bolji rad u naredne dvije godine koje su pred aktuelnim Predsjedništvom, s obzirom da narednu izbornu Skupštinu, shodno našem Pravilniku o radu, trebamo održati 2020. godine.